

Ƙapiya Sën Paulus Kevu Vu Titus

1 ¹Sa Paulus, Anutu yi hur sa, geYesu Kerisi yi sinarë sa, in bë sa gëvonğ balam sën Anutu ggooin sir rağ lo ayoj na timu vu yi medejağ gağek anon sën netatekin aggata niröp vu hil in hil sepa doğ lo ni. ²Tato sa in bë sa nanër medejağ ni nabë deyoh vu bë demedo malaj-tumsën degwata los degwata, noh vu sën Anutu nër yö wirek lo, gağ su nekuung rağ rë. ³Log Anutu sën neğo hil yah vu yi lo nër gağek sagi yam rangah niröp loğ buk sën yö kwa vo beggooin rağ lo. Lob vo huk sënë loğ sa nemağ bë sa nanër rangah vu mehönon.

⁴Lob sa kevu ƙapiya sënë yök vu hong Titus in aluu hoho nehevong ving gağek sënë, om sën getu sa naluğ yönon rağ saga. Hil Amad Anutu luho Yesu Kerisi sën neğo hil yom vu yi lo degevonğ semusemu nyëmasën nök vu hong los degevonğ bayom gëp revuh.

Ğağek Rağ Alam Ggev Sën Deneğın Kerisi-yi-alam Lo

⁵Sa hevuu hong meğenedo Krete in bë gesemu huk vahi sën nahën gesu niröp nerağ rë lo, begwetunğ ggev jağ alam la noh vu begganğ-bu pin saga in degeğın Kerisi-yi-alam. Noh vu sën senër tato vu hong wirek lo bë: ⁶Nabë alam denelë mehöti bë su nevonğ nğaa nipaya rë, geyiğ venë timu. Genabë nalu lo denevonğ ving Kerisi ving, log gağek su neggëp vu sir bë ahëj neving nğaa nipaya jeggın jeggın genengaj dahis rë, og mëm gwetunğ alam nabë saga denatu ggev. ⁷In mehö sën netu ggev lo, og tu Anutu yi hur in geğın yi alam los yi huk. Om sepa doğ aggata niröp mu, in lob alam su denatök vu nğaa nipaya gegëp vu yi. Gesu geğo yi jağ jağ, gesu ahë sengën jağ pevis, gesu nanum mekeyevin, gesu ngis alam jeggın jeggın, gesu gëp natumin monë lu nğaa nabë gekol nğahiseğë. ⁸Gağ mëm gevonğ nivesa vu alam sën deneyam vu begganğ-bu ngwë lo; gahë geving aggata nivesa pin besepa doğ kwa nivesa mu, in bë medo niröp rot megevonğ noh vu Anutu kwa. Najom yi ahon, ⁹genajom gağek anon sën denetahu yi loğ lo ahon geving. Og mëm yi yö yoh vu bë tatekin vu mehönon meğadu sir jağ gağek niröp pin, geyoh vu bë nanër gağek los

kwa, benanër alam sën bë dedahun gägek anon na lo hir gägek tato nabë su niröp rë.

Alam Kuungsën Nğahisekë Denedo Krete

¹⁰Yönon, alam nğahisekë rot vu saga su denesepa loğ gägek niröp rë, gağ yö medo denenër gägek meris meris gedenevonğin bë degekuungin alam. Lob alam sën derah* navij bedetu alam Yuda lo, denevonğ nebë sagi pangşen rot. ¹¹Om gwevonğ balam nabë sagi avij gemir, in denetahu mehönon loğ gägek sën su yoh vu rë lo gedeneko monë rağ. Lob denekepë alam nğahi rağ hir gägek sagi beneggërin sir yah vu sir. ¹²In alam Krete ti sën denër yi bë hir mehö-nenër-gägek-rangahşen ti yi lo, nër sir wirek bë, “Alam Krete sagi, og sir alam gägek kuungsën ata, gesir nebë reggu bemën nipaya, log denevonğ ahëjta gedeneğğëp sehëb.” ¹³Gägek sagi og yönon rot. Om gënanër niwëëk vu sir in dejak hir nğaa nipaya ni borot bedegërin sir, lob mëm degevonğ geving gägek anon niwëëk. ¹⁴Gağ su degevonğ geving alam Yuda hir keriing meris aggagga los alam sën deneruu demij vu gägek anon lo hir horek aggagga. ¹⁵Nabë mehöti ayo niröp bekwa bo nğaa ti nabë nivesa, og nğaa saga nivesa vu yi. Rëk mu alam ayoj ningöhek sën su denevonğ ving Anutu rë lo, og denelë nğaa pin nebë su nivesa rë, gağ kwaj nipaya los ayoj ningöhek rağ. ¹⁶In avij nenër bë derağ Anutu ni, rëk mu nğaa sën denevonğ lo netato bë deruu demij vu yi. Sir alam nij paya gedenekeyëh yi gägek, log su deyoh vu bë degevonğ nğaa nivesa ti rë.

Gägek Rağ Alam Atov

2 ¹Gağ hong, og gënanër Anutu yi gägek megetatekin niröp vu sir megenanër nabë: ²Alam böp og su denanum medekeyevin. Gağ demedo revuh mekwaj bo nğaa niröp, gayoj na timu vu Kerisi niwëëk bahëj geving mehönon, log debare niwëëk in nğaa maggin pin.

³Log avëh böp degevonğ nabë saga geving. Desepa doğ aggata sën yoh vu lo, gesu denanër gägek nah nenga jağ mehö ngwë, gesu denanum bël niwëëk pangşen begëp denatumin. Gağ denatu tatovaha avëh medetahu aggata niröp vu alam vahi. ⁴Detatekin vu avëh avö nabë dejak reggaj log ahëj geving reggaj los naluj lo, bekwaj bo nğaa niröp gedegegin sir nivesa in nğaa nipaya. ⁵Degegin hir huk nivesa log degegin reggaj los naluj lo nivesa, gededoğ vu alam vahi geving, log degurek reggaj hir gägek babu. Degevonğ nğaa pin sënë in alam su denanër pelë jağ Anutu yi gägek.

Gägek Rağ Magëm Lo

⁶Log getato aggata niröp vu magëm lo geving nabë saga, nabë degegin sir nivesa. ⁷Lob nğaa pin sën genevonğ lo, og gwevonğ in degelë medejak ni nabë degevonğ nabë sënë og mëm nivesa. Log nabë getahu alam doğ

gägek, og su gesarömin gägek nipaya geving. Gaḡ kwam bo gägek nivesa jaḡ buk pin beḡenanër. ⁸In nabë ḡenanër gägek niröp mu nabë saga, og mëm alam sën denelë hil paya lo su rëḡ denatök jaḡ nipaya ti gegëp vu hil rë, lob nij namum.

Ḡägek Raḡ Hur Sën Denevonḡ Huk Vu Alaj

⁹Log ḡenanër vu hur sën alam denebaḡo sir bedenetu hir nḡaa meris lo nabë degurek alaj babuj in nḡaa pin. Degevonḡ huk nivesa in alaj kwaj vesa in sir, gaḡ su denanër gägek nipaya nah vu alaj. ¹⁰Log su degodeḡ alaj hir nḡaa mahen teka, gaḡ desepa doḡ aggata niröp mu noh vu buk pin. Loḡ mëm huk pin sën degevonḡ lo gëp nivesa, in lob nabë hil nanër gägek jaḡ Anutu sën neḡo hil yah vu yi lo, og alam degelë nivesa.

Hil Ḡëḡin Hil Nivesa Bemedo Ḡëḡin Kerisi Yi Buk

¹¹Anutu vong yi semusemu vu hil nyëmasën beneggëp ranḡah rot bë alam pin deyoh vu bë denom vu yi bedemedo nivesa geving yi. ¹²Anutu yi semusemu sagi sën netateḡin vu hil bë hil ḡevuu nḡaa pin sën nevonḡ behil su nesepa loḡ Anutu niröp rë lo na; los hil ḡevuu nḡaa nevu nevu dob yi pin sën hil kwad neya vu lo na. Gehil ḡëḡin hil nivesa los tetuu aggata niröp mesepa doḡ Anutu yi nḡaa noh vu buk pin sën hil nahën nado agi. ¹³Gehil medo mabo kwad in Anutu yi semusemu nabë rëḡ anon jaḡ. In Kerisi Yesu diiḡ in bë geḡo hil nom. Om hil medo ḡëḡin buk sën luho Anutu böp denatök nom ranḡah los arëḡ böpata gelos hir vuneḡ vuneḡ yaḡek-yi lo. ¹⁴Yönon, Kerisi diiḡ loḡ yah hil bed in bë baḡo hil nom los bo hil vër in nḡaa nipaya pin, gejevu hil ayod mesemu. Bemëm hil natu yö yi alam, gehil malad sepa nḡaa nivesa mu beḡevonḡ. ¹⁵Om ḡenanër gägek sagi vu mehönon noh vu buk. Gegwee vu sir nabë desepa doḡ gägek sënë, geḡenanër hir nḡaa nipaya ranḡah vu sir. Ḡeloḡ yah Anutu ben, om ḡenanër gägek vu sir, gemehöti su nanër nabë hong mëhö meris mekeyëh hong.

Hil Bare Nidwëëk Megevonḡ Nḡaa Nivesa

3 ¹Gëbër mehönon kwaj noh vu buk nabë degurek gavman los alam pin sën denevonḡ huk gavman lo babuj, gedegetunḡ malaj in huk nivesa pin bedegevonḡ. ²Su denanër gägek nipaya jaḡ mehö ngwë, gesu degevonḡ begö. Gaḡ demedo los mamer, gedegevonḡ nḡaa los malaj yes jaḡ alam pin malaj. ³In ḡeraḡ ni bë wirek og hil kwad ma ving. Lob hil neḡeyëh gägek. Lob Satan nekuung in hil, behil nesepa loḡ nḡaa nevu nevu los nḡaa sën nesemu los nereyiiv hil navid lo mu. Hil nehevonḡ nḡaa nipaya bayod nesis yi. Alam vahi denelë hil bë hil alam nid paya, gehil nehalë sir loḡ yah bë nij paya. ⁴Rëḡ mu Anutu sën neḡo hil yom vu yi lo, vonḡ Yesu yam in bë tateḡin ranḡah nabë nelë mehönon nivesa bekwa

pesivin sir. ⁵Su neko hil yom degwa rak huk yohvu sen hil nehevong lo re, in huk yohvu su neggep vu hil re. Gak neko hil yom rak sen yo kwa pesivin hil lo. Lob ripek hil ngaa nipaya ya, gevong behil atu mewis rak. Lob Anon Vabuung semu hil behil nid vesa rak yah. ⁶Yonon, Yesu Kerisi sen neko hil yom vu Anutu lo tatekin aggata in Anutu gevong Anon Vabuung jak nam hil rot. ⁷Vong neb senen in be naner hil nabehil alam yohvu jak yi semusen nyemasen, getato hil nabehil rek medo maladtumsen degwata geving yi. Om sen hil navo kwad in gagek senen be anon jak. ⁸Gagek sagi og yonon rot.

Lob sa nehevongin be gananer gagek senen niweek, in alam sen ayoj neya timu vu Anutu lo og mem rek malaj sepa huk nivesa vesa medegevong. In ngaa neb senen og nivesa benelok vu alam. ⁹Rek mu tepak kwamasen aggagga sen degwaj ma lo, los sen denetatekin degwaj lo, gegagek ah sengensen, gesen denemehoo sir in horek lo, og gebeya in ngaa nabehil saga. In ngaa senen og su rek dok vu hil re, gak anon ma. ¹⁰Log mehoti sen gevongin nabehil basuh Kerisi-yi-alam lo, og gwero yi gagek noh vu beron ti ma luu. Rek nabehil su gengo ayam re, og ggovek, genim del jak yi. ¹¹In gerak ni be mehonenen sagi og vu aggata niröp ya, om rek geko nyevewen dok nah yi ngaa nipaya sagi.

Gagek Hus

¹²Sek gevong Artemas ma Tukikus nok berup vu hong, lob mem rek genam pevis vu sa vu Nikopolis. In sa kwaq nevo be sek medo saga bebuk-ayöong-yi govek na re. ¹³Gedok vu mehonenen-horek-yi Senas luho Apolos megwero luho hir aggata in luho su dejak vu in ngaa la gep aggata.

¹⁴Log hil alam pin yo detahu sir dok huk nivesa geving in demedo nivesa, bededok vu alam sen denerak vu in ngaa lo geving. Gak su degap sehob behej huk anon nama. ¹⁵Alam pin sen denedo ving sa agi kwaj nevo hong medenenen. Log gananer vu Kerisi-yi-alam sen ahaj neving he lo geving, nabehil he kwamin nevo sir. Anutu yi semusen nyemasen nok gep geving ham.